



Jumat, 23 Agustus 2024
Ogen : Kejadin 24:18-21



Mekacar



Mekacar, e sada biak si enggo jadi kebiasaan sekalak jelma. Adi jumpa teman si lenga itandaina, mis iperkuankenna, ibabaina ertutur, seh jumpa perkade-kadenna. Adi kune la kalak karo, mis daramina celah arah ja dalanna maka ia erkade-kade. Biasana kalak si mekacar mesunah dat teman. La ia permela ras nggit nungkun.

Tupung Elieser, budak Abraham jumpa ras Ribka deher sada sumur, minter iperkuankenna. Mehuli kal pengaloi Ribka rananna. Sitik pe la lit meruntusna ngerana. Ipindoken Elieser gelah itimbana lau i bas sumur e nari gelah banci ia minem, minter kal ibuatna. Ngerana Ribka man Elieser maka unta-untana pe kerina banci itimbaina launa gelah kerina minem. Seh puas kerina untana minem maka ngadiken Ribka nimbai lau. Dungna isungkuni Elieser kerna Ribka ras keluarganya, ituriken Ribka kerina alu payo, kerna ise ia ras keluarganya. Bapangku Betuil, anak Nahor ras Milka. Rumah kami melala nggala ras gagaten man nakan asuh-asuhen, janah inganndu erberngi pe lit nge i je. Bagem penuriken Ribka kerna ise ia ras kecibal keluarganya. Malem kal ate Elieser megisa. Teridah biak mekacar e lit i bas Ribka. Nggit ia ertutur ras nuriken si payo kerna dirina ras keluarganya. La ia sombong, la ia erbual, turikenna situhuna. La metumbur akap Elieser tupung ngerana ras ia. Gedang pe ia ngerana-ngerana la akapna ndekahsa.

Mehuli kap adi biak mekacar enda ipebelin i bas kita. Enda sada asamta ngelai i bas perpulungen. Di kune pe lit kalak si mbaru reh ku perpulungennta, la akapna metumbur sabap mis ia siperkuanken. Ertutur kita seh dungna jadi kade-kade.